

Augsburg, 11. Januar 1562

An Joachim Camerarius d. Ä.

BSB, Clm 10370, Nr. 279.

Clarissimo viro, D. Ioachimo Camerario etc. Domino et amico suo colendo. Leipzig.
 S. P. D. Literas tuas, Clarissime vir, accepi cum D. Huldrichus Fuggerus in suo praedio Mycusiano esset, nec prius quicquam respondere potui, quam eum ipse Cal[endis] Ianuarij ibi conuenissem. Dixit autem mihi in prandio, etiam alijs doctis audientibus, se mandasse suis in Italia, vt filio tuo aliquid subsidij daretur. Quod quò minus antehac fecerit, tua culpa esse factum, qui de sua erga te benuolentia dubitaris, cum a se plura etiam tibi debeantur. Scribo quae audiui. Quid factum sit, è Ioachimi nostri literis erit cognoscendum. Vtinam verò felix procurator fuerim, fidelis profectò fui. De lucubrationibus tuis quod minus es solicitus, et iniquos calumniatorum morsus contemnis: agnosco μεγαλοφροσύνην φίλοσοφικήν, quam ipse pro virili imitabor, et quò minus ea deinceps mihi sit opus, pennas vltra nidum non extendam, οἶκον φίλον, οἶκον ἄριστον ἡγούμενος, nisi me seruitus aliud coegerit. Apud nos Halcyonia nunc sunt. Sed a Septentrione vestro nescio quae procellae multiplices nunciantur. Quae faxit deus, vt in Oceano subductis nauibus desaeuant. Vale. Augustae Vindelicorum. 3 Idus Ianuarias. 1562.

Hiero[nymus] Wolfius.

Cos. Hainzelius plurimam tibi S. D.